



17.okt 2016

UKA2016/75

Immikkut ittumik suliniutit meeqqanik inuusuttuaqqanillu sumiginnaasarnerup annikillisarnissaanut pingaartumillu angajoqqaatut akisussaaffimmik erseqqissaanissamut tunngasut ingerlanneqarsinnaanerat pillugu apeqquaqaat aallaavigalugu Inatsisartut oqallinnissaannik siunnersuut.

(Inatsisartunut ilaasortaq Anthon Frederiksen, Partii Naleraq)

Inatsisartuni ilaasortaq Anthon Frederiksen Partii Naleraq oqallinnissamik siunnersuuteqarpoq tassalu meeqqanik inuusuttuaqqanillu sumiginnaasarnerup annikillisaarnissaanut tunngasumik tamannalu oqaaseqarfigissavarput.

Nunatsinni meerartagut inuusuttortagullu siunissaraagut tamannalumi ilumoorpoq taamaattumik siunissami meeqqanut inuusuttunullu atugassarititaasut sukumiisumik malinnaaffigalugillu eqqartortariaqarput.

Unalu aallaqqaammut oqaatigerusupparput nunatsinni meerarpassuaqarmat inuusuttorpassuaqarmat toqqissillutik inuusunik, ilaqutariippassuaqarmat ingerlalluartunik tamakkulu aamma nipituumik tulluusimaarutigisariaqarpagut inuimmi nuannaartorisaaqaleraangatta aamma anguniakkagut annertusisarput.

Kisiannili aamma amerlavallaaqaat meeranguit sumiginnakkat tamannalu tassa akuersaaginnarlugu inuusinnaajunnaarpugut.

Miseratigineqarsinnaanngitsumik inuttut inuunikkut ajornartorsiuteqarpassuaqarpugut tamannalu eqquinerlorujussuuartarpoq meeqqanut inuusuttuaqqanut ilaqutariinnut ilami inuiaqatigiinnut tamanut.

Ulluinnarni inuuniarnikkut atukkagut qiviaraanni inuit atugaasigut assigiinngissut alliartuinnavippoq sulinikkut aningaasanngorlugit isertittakkagut qiviaraanni naligiinngitsorujussuarmik inissikkiartuinnaarpugut taamatullu siunissamut ingerlaannassagutta ilagut inuuniarnikkut ajornartorsiutillit tamaasa inuit katagassavagut tamannalu ingerlaasinngoriartuinnaartoq akuersaaginnarsinnaanngilarput.

Maani eqqarsaataaserput allanngorluinnartariaqarpoq ilaqutariit inuuniarnikkut ajornartorsiorpata ikiortariaqarput, imaanngitsoq ajornartorsiorpata meerartaqarpata meeraanik arsaarlugit, tamanna inunnut erloqillutik inuusunut suli aamma meerartalinnut artornarnerujussuannngortarput, meeqqap anaanaap ataatallu asanninnera qanorluunnit inuttut ajornartorsiuteqartigigaluarpat pinngitsoorsinnaanngilaa.

Meeraq angajoqqaaminik peerneqarpat meeqqap tarnaa nusunneqartarpoq, angajoqqaat qimallugit allamut nuutsitaaneq meeqqamut qanoq sunniuteqapiluttassasoq

takoorloorsinnaavarput. Aap ajornartorsiorpata angajoqqaat meeqqanik arsaarnagit ikiortigit, sumummi iluaqutaassagami ikiugassat angajoqqaat imminiiginnarlugit meeraanik arsaaginnassagaanni? Ilaqutariit ataatsimut ikiortariaqarput, aammalu meeqqat sapinngisamik allamut pisinneqassappata ilaqutaasunut inissinneqartarpata pitsaannerusutut isigaarput.

Ilaqutariimmi tamarmik ajornartorsiunngitsut tamakkuninga atugallit qiviraanni takusinnaajuannarparput, tamakkulu meeqqamut toqqissinarnerujussuussapput ilaqutariimmi iluani inissigaanni aamma meeqqap tarninga illersorneqarnerujussuussammat.

Tupinnarluinnartumik ukiuni makkunani meeqqanik inuusuttuaqqanillu sumiginnaanerput annertorujussuusoq tamatta ilisimavarput tamannalu soorunami akuersaarneqarsinnaanngilaq allanngorluinnartariaqarporlu.

Meeqqat inuusuttuaqqallu illersorneqassappata taava uagutsinnut piumaffiginerulertariaqarpugut. Ulluinnarni inuunikkut takutitsinerput allanngortariaqalerpoq maligassiunerusarialerpugut ilami inuunerluppallaarpugut tamannalu uagutsinnut piumaffigaluta allanngortitariaqarparput.

Imerajuttuunermik ikiaroorajuttuunermillu tamatta kalluarneqarsimavugut, tamannalu inuusaaserput ajortoq allanngussappat taava tarnit salinneqartariaqarput katsorsaanerit inuttullu ikiuinerit annertusartariaqarput, tamannalu aamma anguneqarsinnaavoq ulluinnarni inuiaqatigiit iluanni isigititsinerput kusanarninngortitariaqarparput meeqqammi inuusuttullu ullut tamaasa isigaatigut.

Meeqqanut suliniutit iluatsissappata taava aamma ulluinnarni inuuniarnikkut atukkagut qiviartariaqarpagut inuussutissaqarnissat angerlarsimaffeqarnissat angajoqqaaminnik paarilluarneqarnissaat anguniartuartariaqarparput tamakkulu qulaarneqassappata aamma ilaqutariit aningaasaqarnikkut naligiinnerullutik atugaqarnissaat pitsaanerulernissaallu anguniartuartariaqarpoq.

Hans Enoksen